



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 3



Taoba Philippines tir Benigno Aquino süogo



IPFT lenirtemi BJP national tir JP Nadda den ajurutep

VOL. XVIII NO. 251 (ADOK 251) DIMAPUR

ROGONÜ (FRIDAY)

AAMI (JUNE) 25, 2021

₹ 5.00

Nagaland nung COVID-19 active cases 1,509 lir

Kohima, Aami/June 24 (TYO): Nagaland nung Brehostibarnü nisung tasen 88 dak COVID-19 jangjateta tang tashinung iba tashidak agi meneper ajak senteper nisung 24,629 jungogo, aser kasa anogo nisung 155 taneptsü ngua state nung iba tashidak nungi taneptsü angur ajak agi nisung 22,000 alitsü.

"Tanü state nung coronavirus positive nisung 88 dak putet; Kohima nung 36, Dimapur, Mokokchung aser Peren district shia 11, Zunheboto nung 9, Tuensang nung 7 aser Mon nung 3," ta State Nodal Officer for Integrated Disease Surveillance Project Dr Nyanthung Kikon-i anogoshi sangdongba COVID-19 bulletin nung ashi.

Paisa kasa anogo nisung 155 - Mokokchung nung 55, Dimapur nung 48, Kohima nung 17, Tuensang nung 14, Zunheboto nung 11, Kiphire nung pezü, Mon nung asem, Peren, Phek aser Wokha nung kaka - taneptsü ngua tang state nung iba tashidak nungi taneptsü angur ajak agi nisung 21,945 alitsü, ta ashi.

Bodhbarnü state nung COVID-19 tashidak nungi taneptsü angur shilem 88.79 liasü aser Brehostibarnü taneptsü angur shilem 89.1 kumogo, koba March 19 nü shilem 97.98 liasü.

Tang state nung COVID-19 active cases 1,509 alitsü, ta pai ashi.

Tang active cases alirtem rongnung nisung 134 dak iba tashidak agi sümia timtem agütsür, nisung 37 timtem tera lir aser oxygen inoker lir. Nisung 18 kanga mejungi kangshia oxygen nung lir, nisung 8 temang kangasa mejungi ICU nung

ventilator medeni lir aser pezü ventilator nung lir. Nisung 1,308 dak temang nung COVID-19 tashidak agi timtem agütsüba mali, ta pai ashi.

Kasa anogo COVID-19 positive nisung ana - Kohima nung ka aser Zunheboto nung ka - asüba ajanga asür ajak agi nisung 479 jungogo, saka yangji nisung 14 bo danga tashidak agi asüba lir, ta pai ashi.

Ajak senteper COVID-19 agi menepa alir nisung 696 danga state temi ogo, ta ashi.

Tang tashinung COVID-19 tashidak alitsü südi ta temolung melemeti Nagaland nung sample 2,18,841 tendangogo. Itemji RT-PCR nung sample 96,180, TrueNat nung sample 60,648 aser Rapid Antigen Test nung sample 62,013 tendanga liasü, ta Dr Kikon-i ashi.

Bodhbarnü tashinung Nagaland nung nisung 3,79,197 nem COVID-19 mozü dosen 4,38,489 agütsüogo, ta State Immunization Officer, Dr Ritu Thurr-i metedaktsü.

State nung COVID-19 mozü agütsür aliba rongnung frontline worker 59,988 alitsü, healthcare nung inyaker nisung 15,775 alitsü, nisung 1,42,533 bo arishi küm 45 nungi tema aser ano arishi küm 18 nungi 44 tsingta nisung 1,64,093 alitsü, ta pai ashi.

Nisung 56,100 nem COVID-19 doses tanabuba agütsüogo, anungji parnok iba vaccine course ajunga tembanga agir asütsü.

Parnok rongnung frontline worker nisung 28,542 alitsü, healthcare nung inyaker nisung 10,392 alitsü, arishi küm 45 tema nisung 17,159 alitsü aser arishi küm 18 aser 44 tsingta nisung tenet alitsü, ta Dr Thurr-i ashi.

NVCO-i state nung lokti balalai sarusajiba ken o ashishi

Dimapur, Aami/June 24 (TYO): Nagaland chief secretary aser DGP-i state nung ozüing alema telungpurtem inyakyim aziüoktsü merangdar ta ashiba dak sendakba nung NVCO-i telangzüba agütsüogo.

Wara pokteter aliba ajanga state mokdaner aliba mapang ozüing alema sarusajiba ajanga jenjang ajungketba dak sendakba nung Nagaland Voluntary Consumers' Organisation (NVCO) ajem ajema melitetsü, ta shiogo. Iba inyakyim ajanga sensakertem dak tamajungba kongshir aser nüburtemi ozüing alema sarusajibatem yimdangi arur.

NVCO-isa, nüburtem ajak dang state sorkari tang tashi state nung 'State Human Right Commission' amenoka mali ta metedaktsüogo, koba India temzüing ozüing kübok state ajak nung amenoktsü tetuyuba agütsür lir.

Human rights activist Radhakanta Tripathy-i benokba ken o dak ajemdaker National Human Rights Commission (NHRC)-i, Nagaland chief secretary dang state nung basic human rights agütsütsü tetuyuba agütsüogo. Ken o benokba nung state nung tsüingsang mongpu ajak nung amshiteba lenman yanglua mali, tajemtsü tziü, primary health care aser education facility amala yimdak yimtsüngtem nung agüja mali aser kasa mapang nung centre aser state sorkari benokba social scheme tem shidak mebenoker ta shia lir.

Peition nungsa, Nagaland nung aliba nüburtemi sorkar saru dak alia telungpur telok pongu; NSCN(I-M), GPRN/NSCN, NSCN(K) aser Naga

National Council (NNC) telok ana nem saru agütsür, ta shia lir.

Telungpurtemi ozüing alema sarusajiba den sorkari jenjang shidak magiba ya right to life dak sendakba nung aibelen ka lir. Human rights activist Tripathy-isa, ozüing alema tenokdangba kecha makai telungpurtemi Nagaland nung alirtem dang saru meshiba aser Nagaland nung Highway aser check-gates tem nung commercial vehicle tem dang rakzükraktemba tuteta shiogo.

NHRC-i ken o benokba sülen Nagaland chief secretary aser DGP nati state nung ozüing alema telungpurtem inyakyim aziüoktsü takok tashi merangdar ta shiogo. Iba sülen CNCCI, DCCI aser MCCI amala shishilembaba lokti tentetemi Naga political groups (NPGs) ajak dang saru aika mesarutsü khangogo aser state sorkar dang state nung ozüing alema sarusajibatem nokdaksü khangogo.

Federation of Nagaland Chamber of Commerce and Industry (CNCCI)-i ozüing alema sarusajiba ashishiogo aser telungpurtem dang item inyakyim nungi pilaa alitsü khangogo. CNCCI-isa, nüburtem dang state nung oset jenjang tali akümba state sorkar aser NGP tem dang dang ashishitsü ayongzüka den Covid fund nungia saru agir, ta ashi. Kasa mapang nung Dimapur Chamber of Commerce and Industry (DCCI)-i, telungpurtemi transportation tax agiba den tanga saru balala saruba ajanga Nagaland kübok tesem timba nung oset jenjang talir akümer ta shiogo. Mokokchung Chamber of

Commerce and Industry (MCCI)-ia, telok kari ozüing alema saru meshia nüburtem ket nungi rakzükrakdemtsü meranger ta shiogo.

Shishilembaba lokti tentetba balala timtemba dak sendakba nung NVCO tir Kezhokhoto Savi-i, NHRC-i ken o benokba dak sendakba nung Nagaland chief secretary aser DGP nati telangzüba agütsüba ashishiogo. Pai, Chief Secretary aser DGP nati NHRC nem telangzüba agütsüba ya koba tashi mapa küma inyaka odar, ta asüingdang, kechiyong shishilembaba lokti tentet aikati state nung telungpurtemi ozüing alema inyaksangshiba nokdangtsü maneni khangar arudar.

Kümshia Comptroller and Audit General (CAG)-i, Nagaland Legislative Assembly nem agütsüba osang nung state department balalai sen crore aika mashiyimi amshiba, odangtetsü makokba mapatem, project balala inyakba dak temolung malemba, mapa minyaki taa agütsüba amala ochi mashi inyakyim densema lir. CAG osang dak alia state nung tejak repranga inyaksangshiba, backdoor appointment, contractor tem bill nungi Party fund tenüing amer commission meshiba ochi mashi ken o aika lir aser item maparentem ajanga lenmang majungba, health care facility, schools, hospital, district offices densema sorkar meyong kitem tia majungba, tajemtsü tziü shidak manguba aser electricity service shidak magütsüba amala timtemtem adoker, ta tir-i ashi.

(Maneni tapak 2 nung...)

COVID-19 wave tasembuba atema renema lir: Manipur CM

Imphal, Aami/June 24 (TYO): COVID-19 tashidak wara wave tasembuba ya arununga koktettsü aser coronavirus tabu tasen poktetba nungia jenbutüsü Manipur renema lir, ta Chief Minister N. Biren Singh-i Brehostibarnep Imphal nung aliba Jawaharlal Nehru Institute of Medical Sciences (JNIMS) semdangba sülen ashi.

Pa ya JNIMS tempus nung oxygen plant ka tang teyangludak aliba semdangi oa liasü. Iba plant ya commission asüba sülen medical oxygen ya 2,000 KL yanglutsü, ta pai ashi.

Iba oxygen plant ya July 15 tashinung commission asütsü imlar. Mozüki nung aliba post-COVID-19 ward nem medical oxygen cylinder 200 agütsütsü atema ano plant ka terenemlen lir, ta Biren-i ashi.

Hospital complex nung 100-bed ward ka lir, koba tekeratiba nung tajungba kuma yanglushitsü, kechiaser coronavirus ya tabu balala putetyonga aor.

"COVID-19 nungi jenbutüsü mera tajungtiba aser ajak agi mozü agütsüba ya dang lir. Nüburtem ajungai

mozü ya agütsüba. Telung nung nisung kari miimshia mozü indang tiaziü olulu prokshir, koba takotet nisungtemi amshitsü mela lir. Nisung aikati item tiaziü olulu nung among mozü magiba ngua temolung shiranger," ta Manipur CM ajanga ashi.

"Maneni tashi mangaba lira, sorkari tashi amshitsüsa akumtsü aser iba mapang nüburtemi police aser sorkar tenüing masentsüla."

Nisung kari vaccination campaign nunga yimten inyakyim dendaktsür, ta pai sasaseta ashi.

India nunger aser danga linüktem nung nisung million aika mozü agiogo. Tang anünga aliba nisungtemi tekeratiba nung atsiänem makai mozü ya agütsüba, kechiaser iba mozü yagi mapa junga meinyaker mesüra temang nung timtem agütsür ta olulu prokshiba ya tamendak dak mali, ta CMBiren-i ashi.

Manipur nung COVID-19 mozü agütsüba maparen nung imlaba ama jangratema renloka maor aser nüburtem nungi telangzüba tajung mangur, ta ketdangtsür osang ka ajanga ashi.

Mokokchung DPDB senden nung onük balala sensaksemogo

Dimapur, Aami/June 24 (TYO): Ita shia amenba Mokokchung District Planning and Development Board (DPDB) senden June 24 nü District Planning Hall, Mokokchung nung menogo. Iba senden ya Minister, Mechanical & Housing, Tongpang Ozukum lenisüba nung agia liasü.

DPDB mendenbuba ama mezüngbuba senden nung shilem agiba mapang Tongpang Ozukum-i, Mokokchung district nung aliba nüburtem atema District Planning and Development Board len anitsü asoshi pa nem maangka agütsüba atema kanga pelaba lemsatepba den pei akokba yari tajungtiba inyaksü atema senden nung adenertem ayongzüik.

Senden nung tang Salangtem Ward kübok Mokokchung Power House amenoka aliba ali ken o benoka sensak asem aser Power House ajungkettsü aser terenlok atema ali kibur ket nungi ali alizüktsü telemtetba agi. Iba dak sendakba nung department den tongtepratepa jenjang tapet agütsü bangjem.

Mokokchung district nung COVID-19 tensa dak sendakba nung CMO Mokokchung, Dr.

Chubala Aier-i, osang agütsüba den Mokokchung District Health facilities atema tenüngdakbatem lemsatep. Lai District COVID Hospital nungi tenzüka district kübok Primary Health Centres (PHCs) tem ajungkettsü nungdakba lemsatep aser iba dak sendakba nung house-i mozükidang power generator ana anepalutsü aser yimtsüingshia nem oxy-metre kakabosa agütsütsü lemtet.

Maneni senden nung sorkar tetuyuba dak ajemdaker LADP fund nungi shilem 10 agizüka district nung covid dak sendakba nung senotsü intokbatem mesemtsü atema COVID District Task force nem agütsütsü lemtet. DC office nung gari anishirtem agi anüingba onük indang sensaksemba mapang, house-i tapet ketdangtsürtem den tongtepratepsü mulung agizük.

Mokokchung Law College, ki bena tanga tesem kati belener aotsü atema sensaksemba mapang Law College ya tanga tesem kati takaratiba nung belener aotsü aser tang yanglua aliba DC office takaratiba nung temba yanglutsü lemtet.

MMC jana bendenba tesem indang onük benoka sensak asemba mapang house-i iba tesem ajungkettsü aser ali kiburtem ket nungi ali alizüktsü atema telemtetba agi.

Kasa mapang nung mendenbubai jila teyongtsü madentsü atema Mokokchung Town ring road ya yanglutsü benokdang, kechiyong jila nung terenlok maparen manger mesangwa tsüingda inyakteper aser iba ajanga gari senzüsünpong mesademi küma timtem tulu adoker. House-isa, 2021-2022 atema LADP proposal agizüka liasü.

Wara pokteter aliba mapang Mokokchung Town Baptist Arogo (MTBA) aser Mokokchung Town Ao Lanur Telongjem-i teyari tulu agütsüba aser Moa-i COVID agi shirangertem anishitsü atema ambulance driver ama inyaksü pa mapang agütsüba atema Tongpang Ozukum-i kanga pelaba lemsatep. Paisa, COVID-19 den raraba mapang lenla balala nung tejakdangi arua teyari agütsürtem ajak danga kanga pelaba lemstepogo.

Covid-19 tashidak nokdangtsü atema senso shia teinyaktsü asem :

Tangar alidak teti teni tebang nembanga mask temerük agiang;

Tangar den tsüktepa tenokdak aser temen;

Teti sapon agi teka metsükang.

APC-i Dimapur nung project tem asadang



APC Nagaland Y. Kikheto Sema, IAS-i June 24 nü Agri Expo Site, 4th Mile, Dimapur nung Agri project tem semdangba noksa nung angur.

Dimapur, Aami/June 24 (TYO): Agriculture Production Commissioner, Nagaland, Y. Kikheto Sema, IAS-i Superintendent Engineer (Agri), Er. Achakbou Newmai den külemi June 24 nü Agri Expo Site, 4th Mile, Dimapur nung tang inyaka aliba project balala asadangogo.

Agri Expo site nung tang yanglua aliba Community Marketing Complex asadanga mapang Sema-i, Nagaland nung adokba organic Agri aser allied product tem iba hall nung angutsü. Iba hall tasazük 125x80 feet lir aser stall balala 66 angutsü, ta ashi. Ki amshiba taa tera dang agütsür pei yanglutetba/züsentetba ayoktsü jangraba local entrepreneurs tem nem shishilembadak ka agütsütsü nükjidong nung sorkari iba ki yanglur, ta Sema-i ashi.

Sema-i ashiba agi, süoshitem AC keta aliba shishilembadak tajungtibatem nung ayoker ajisüaka anosotsü aser süngjanglijangtembo lendi nung ayoker, anungji tachi tajemtsütem ya temerek tesem nung ayoktsü nüngdaker.

Iba marketing complex nung café ka aser gari anendak sadem sadema yanglutsütsü aser taa agütsür amshitsu atema metsümeshidak ka yanglutsütsü. Iba facility ajanga mapa mongui aliba lanur 140 shi nem mapa inyaksü asoshi maangka agütsütsü imlar, ta pai ashi.

State nung tsünütetba organic aonsotsütem Dimapur tonga bener arutsüla, kechiyong Dimapur ya shishilembadak tesem tulu ka, aser state nung aonsotsütem aika züsentetba ajanga tangalen nungi aonsotsü bener aruba tanem tanemi nokdangtsü, ta pai ashi.

Maparen asadanga sülen inyakyim dak temulung asüba pai lemsatepogo, koba ita ana tejakdang tenzüka liasü. Paisa, nüburtem nem Christmas sempet ama agütsütsü asoshi taküm kümsa ki ya tembanga yanglutsü tetuyuba agütsüogo.

Iba shishilembdaka ya model market ka kümdaktsüti aser iba shishilembadak takok ngua inyaksangshitetra tanga district nunga kasa shishilembadak yanglutsü, ta Sema-i ashi.

Kasa mapang nung APC-i tang teyangludak aliba Farmers'

Hostel semdangogo, koba 2020 küm December 8 nü Agriculture Minister, G. Kaito Aye-i nüngshilong azüngja liasü. Yipden 100 aketba farmers' hostel ya Minister for Agriculture, Kaito-i achaayanga RKVVY additional fund kübok yangludak.

Hostel yangluba nükjidongji, Nagaland kübok district balala nungi aluyimertem anenzükdaktsütsü aser Dimapur-i organic aonsotsütem bener arutsü atema parnok ajungmesotsü atema lir, ta pai ashi. Asemben tashi atongtepa tua süa aliba ki nung sorchiokdak ka, chiyongdak takdang ka aser metsümeshidak keta lir aser APC-i, SE (Agri)

aser contractor dang iba mapa taruba küm Christmas matong tsüngda tembanga yanglutsü tetuyuba agütsüogo. Paisa inyakyim dak temulung asüba lemsatepogo.

Maneni APC-i Nagaland State Agricultural Marketing Board (NSAMB) indang Organic AC Market semdang aser, iba shishilembadak district balala nungi organic aonsotsütem bener arua ayokba ngua pelaba lemsatep.

Security Forces temi NSCN züngsem kar apu



Dimapur, Aami/June 24 (TYO): Security Forces temi Police den lungjemer June 23, 2021 nü general area Thilixu village, Dimapur nung operation ka agiba mapang Nikki Sumi telok indang züngsem tenet aser OGWs pezü pua liasü, ta osang ka ajanga ashi.

Osang tejangja kar nung ajemdaker Security Forces temi state police den lungjemer operation agiba mapang NS Highway module nung Nikki Sumi Group nungi tashiyim amshia senotsü meshiba mapa inyaker aser ozüng alema mess

lapoker züngsem tenet aser OGWs pezü pua liasü.

Iba mapang parnok ket nungi point 32 pistol asem den magazine, point 32 indang injang 25 aser zülubanglu kar nguteta liasü.

Iba dak sendakba ken o maneni bushisüngdangtsü atema pua alirtem den parnok ket nungi ngutetba osettem ya Diphupar Police Station, Dimapur nem agütsüogo, ta ashi.

Maneni Security Forces ajanga Police den lungjemer June 22, 2021 nü general area Burma Camp, Dimapur nung

operation ka agiba mapang NSCN (IM) züngsem ka pua liasü.

Osang tejangja ka nung ajemdaker sepaitemi mita bushiba mapang prangbong aser injang shibelenba nung shilem agir NSCN (IM) züngsem ka pua pa ket nungi point 22 pistol ka aser point 22 indang injang asem nguteta liasü.

Ken o maneni bushisüngdangtsü atema pua alisang den pa ket nungi ngutetba osettem East Police Station, Dimapur nem agütsüogo, ta sangdong ajangasa ashi.

MALT ajanga Minister Imna Along dang pelaba lemsatep

Dimapur, Aami/June 24 (TYO): Minister, Higher Education & Tribal Affairs aser BJP Nagaland tir, Temjen Imna Along Longkumeri Community Health Centre, Mangkolemba nung COVID-19 wara mapang amshitsu atema face masks, sanitizers, oxygen concentrator, oxygen regulator aser Rapid Antigen Test kit tem agütsüba asoshi pelar, ta Mangkolemba Ao Lanur Telongjem (MALT) sangdong ka ajanga ashi.

Minister Imna Along-i iba Community Health Centre semdangba mapang mozüki kanga mejungi raksar aliba ajiteta iba mozüki pai yanglushitsütsü nangzükba ama maparen tatemleni arudagi, ta sangdong ajanga ashi.

Iba den mapang shia ozü leniri lennang balala nung nübur den yaritepa aruba atema kanga pelar. Tsüngremi pa takum, wadang maneni nübur asoshi moajangma, ta MALT sangdong ajanga ashi.

Tuensang nung teyari oset agütsü

Dimapur, Aami/June 24 (TYO): Deputy Commissioner aser Chairman, District Task Force on COVID-19, Tuensang, Kumar Ramnikant ajanga June 24, 2021 nü Town Hall, Tuensang nung anogoshi aayanger nem teyari oset agüja liasü.

COVID-19 tashidak wara prokshia aoba azüoktsü nükjidong nung lockdown benokba ajanga timtem ajura aliba nisungtem nem iba teyari osettem ya District Disaster Management Authority, Tuensang ajanga anepaluja liasü.

Khensa yimtsüng nung nisung ajak nem vaccine agütsüjemogo



Dimapur, Aami/June 24 (TYO): Mokochung district, Ongpangkong South block kübok Khensa yimtsüng nung temsüa alirtem ajak nem Covishield vaccine agütsüogo.

Khensa Village Council, NSRLM Ongpangkong South Block and Department of Health aser Family Welfare, Mokochung tsüngda kanga junga sendaktepa inyakba ajanga iba mapa takok ngutetogo.

NSRLM SHG tem, Arogo lenirtemi grass root level nung jenjang tapet agiba den Khensa village Community Surveillance Team-i (ASHA, NSRLM Community Cadres aser Anangwadi) kibongshiai tua inyaksangshiba ajanga data shidak bendentetogo aser vaccine agütsü asoshi nüburtem ajungmesotetogo.

NSRLM aser HFW department-i jenjang agi metenzük tsüngda yimtsüng nung alir nüburtem shilem 40 bo vaccine agiatoker liasü. June 17 nü mezingbuba shilem nung vaccine agütsü temsüa alir nisung 313 nem vaccine agütsü aser June 22 nisung 225 nem vaccine agüja liasü.

Mokochung District Immunization Officer, Dr Ayangla Saku aser lar team-i, vaccine agiba mapang tentüngdaka nübu aser teyari agüja iba sentong takok nung tembangogo.

Yimdaklirtem ajak nem vaccine agütsütsü asoshi sentong

yanglur tenzüka ama takok ngua inyaktetba dak sendakba nung Khensa Village Council Chairman Imtitoshi-i ashiba agi, Khensa yimtsüng ya jila anasa lir aser lokti nung tashidak menatepa aotsü ana nung lir asünung nüburtem ajak nem vaccine agütsütsü kanga nüngdaka aküm. Yimdaklir noklang nung noklang nem vaccine agütsütsü asoshi inyakyimji mezüngbo kanga tasak amai, saka kari tongpu apur inyaka tatishitsü sayutsü nüngdaker, ta paisa ashi.

District nung Khensa yimtsü ya yimtsüng tulutem rongnung ka lir aser nütsünyongsüka aika lir aser tang iba yimtsüng ya nüburtem noklang nung noklang nem vaccine agütsütem rongnung densengogo.

Kasa mapang nung Khensa Village Council-i, Dr Ayangla Saku-i anir medical team, DIO Mokochung aser staff; Sangpangjang, EAC Ongpangkong; Dr Asenla, MO aser Amenla, Sapangya PHC nungi Nurse; Tzüdikumla (Kumlong), Nurse; Khensa Medical Sub-Centre staff; Surveillance Committee Khensa; Khensa Students' Union; Imkongtoshi, Block Program Manager, Ongpangkong South, NSRLM; Maynaro Jamir, Area Co-ordinator, NSRLM, RD dang kanga pelaba lemsatepba den yimdak beneficiaries ajak danga kanga pelaba lemsatepogo.


NVCO-i state nung lokti.. (TAPAK 1 NUNGI...)

Maneni NVCO-i ashiba agi, police aser government agencies tem densema iba amala lokti tentetemi ozüng alema sarusajiba ajanga state nung oset jenjang tali akümer. NVCO tir Kezhokhoto Savi-isa, parnoki check gate aser highway tem nung ozüng alema sen saruba nokdangtsü atema Gauhati High Court-i 03.06.2014 nü tetuyuba agütsüba mapa küma inyaksü atema state sorkar dang aiben

mepeshiogo, ta ashi.

Iba dak sendakba nung 22.06.2009 nü state sorkari, Police, Excise, Forest aser Taxes department densema kija mesera lokti tentet kechaia saru mesarutsü telemtetba agiogo. Anungji check-gate mesera highway tem nung sarusaji kecha mesüdaktsütsüla, ta NVCO-i ashi. NVCO President Kezhokhoto Savi-i, tang lokti nung ochi obendang nüngdaker ta ashi.

Aizawl central jail nung tepuoker 19 dak COVID-19 putet



AIZAWL CENTRAL JAIL (FILE PHOTO)

Aizawl, Aami/June 24 (Agencies): Aizawl central jail nung ano nisung 19 dak Covid-19 tashidak putetba sülen taoba ghonda 24 tsüingda state nung tashidak menar 226 jungogo aser Brehostibarnü tashi nung positive rate 7.20 per cent nung lir, ta health ketdangsür kati ashi.

Bodhbarnüa central jail nung tepuoker 103 dak tashidak keta aliba putetogo, ta ketdangsürisa ashi.

Paisa, state nung taoba ghonda 24 tsüingda Covid-19 tashidak agi nisung ka süa, asür ajak senteper 86 jungogo, ta ashi.

Mizoram nung Covid-19 tashidak menar 18,624 jungogo aser item rongnung nisung 4,442 tang temang anepaludar aser nisung 14,096 anepogo.

Brehostibarnü tashidak

puteter 226 ya Aizawl district nungi 140, Kolasib district nung 37, Lunglei district 31, Siaha district 8, Hnahthial district 5, Lawngtlai district 3, Serchhip aedr Kolasib district nungi kaka lir, ta ketdangsüri ashi.

Tashidak mena alir 41 Zoram Medical College indang RT-PCR laboratory ajanga putet, nisung 12 TrueNat laboratory balala ajanga aser tanungba 170 ya district balala nung Rapid Antigen Test ajanga putet, ta paisa shisem.

Taoba ghonda 24 tsüingda tashidak putetertem rongnung tanur 54, yakbang nung inyaker 2, Border Security Force BSF (BSF) jawan ka densema lir, ta pai ashi.

Tashidak menar alirtem rongnung parnok trok tangalen senzüba jangjaogo aser tanungba nisung 220 ya state

nung menaba ta jangjaogo.

Tashidak puteter 226 rongnung 116 dakbo Covid-19 tashidak keta aliba temaitsü sayudar.

Taoba ghonda 24 tsüingda sample 3,136 tendangba sülen item nisungtem dak tashidak puteta liasü, ta ketdangsüri ashi.

Tang tashi nung Mizoram nung sample lakh 4.65 tendangogo.

State nung recovery rate 75.68 per cent aser mortality rate 0.46 per cent nung lir.

Kasa mapang nung state immunisation officer Dr Lalzawmi-i ashiba agi, Bodhbarnü tashi nung nisung lakh 4.37 nem vaccine agütsüogo aser item rongnung nisung 53,892 nembo Covid-19 vaccine dose anaprongla agüjatokogo.

Agartala nung chi auso ka sen 1 yong sensakertem nem agütsür

Agartala, Aami/June 24 (Agencies): Social activist Biplab Kar-i tanga shishilembartem teyari nung Tripura yimtiba Agartala nung wara pokteter aliba mapang teyari agütsütsü atema asalendong tajung adongteter inyakdar.

Parnoki Agartala nung sensakertem nem sen ka yong chi auso ka ayoker.

Iba sentong tajung apiteta inyakba ajanga lokti nung sensakertem nem teyari tulu agüja arudar, shirnok wara pokteter aser state mokdanga ayuba ajanga tamajungtiba kongshir lir.

Social activist Biplab Kar shiba Tripura e-rickshaw Sramik Samiti tir lir pai, wara

poktetba mapang nungi sensakertem nem teyari agütsütsü asoshi kechisa takoktsü ali aji ajak inyaka arudar, ta ashi.

Anogoshia sen ka yong nisung 200 shi mesüa arudar.

"Chiyongtsü agütsüba dak alia onoki ration kits, masks aser sanitizers tem lemstüba amala jenjang balala agia arudar. Onoki Bodhbarnü nungi tenzüka chiyongtsü agüja arudar aser maneni inyakyonga aotsü merangtsü" ta Kar-i ashi.

Kar-isa, chi aser songolemba aon hopta nung anogo pongu nü agütsütsü aser anogo ka entsü mesera anogo agütsütsü aser anogo ka shi agütsütsü, ta ashi.

Assam CM-i ONGC asset tem OIL nem agütsüda ktsüner

Guwahati, Aami/June 24 (Agencies): Assam Chief Minister Himanta Biswa Sarma-i Northeast nung ONGC (Oil and Natural Gases) indang asset tem OIL (Oil India Limited) dangi transfer süda ktsünüba lemsatepogo.

Assam CM Himanta Biswa Sarma-i, Ato Kilonser Narendra Modi dang Northast nung ONGC indang asset tem OIL dangi transfer asütsü asoshi asadangsü mepeshia shiti ka zülüogo.

Taoba mapang Union Petroleum Ministry-i, totzü tali adokdaksütsü atema ONGC dang oil field tem nung stake aser hive off drilling tanga firm dang ayoktsü atema tetuyuba agütsüogo

CM Himanta Biswa Sarma-i Ato Kilonser dangi shit nung,

nomination ONGC nungi OIL-i transfer asüba ajanga asset transfer asüba nung kecha tetsüda ktsü madoktsü ta shiogo.

"India sorkari North Eastern Region nung ONGC indang ali ajak OIL dangi transfer asütsü atema asadangktsüner," ta Assam Himanta Biswa Sarma-i Ato Kilonser Narendra Modi dangi züluba shiti nung shia lir.

"OIL ya Assam nung tenzüka aser küm aika inyakshangshia arudar. Oil India aser nüburtem tsüingda tesendaktep ya tenüing asangsü langa lir. North Eastern Region ajanga nung maparen ajak ya telok kati dang achaayangtsüla ta bilemer aser OIL nem achaayangdaksüner," ta CM Sarma-isa ashi.

IPFT lenirtemi BJP national tir JP Nadda den ajurutep



IPFT lenirtemi BJP national tir JP Nadda den Bodhbarnü nikongtsütsü New Delhi nung ajurutepba noksa nung angur.

Agartala, Aami/June 24 (Agencies): Tripura nung BJP den longjemer aliba Indigenous People Front of Tripura (IPFT) party lenirtemi BJP national tir JP Nadda den Bodhbarnü nikongtsütsü New Delhi nung ajurutepogo.

Tripura nung talisa tribal tem aliba tesemtem nung BJP aser IPFT pusemertem tajemba küm aoba mapang ka nung BJP national tir JP Nadda-i IPFT lenirtem jaoka liasü.

Tripura tribal welfare minister Mevar Kumar Jamatia densema IPFT lenir pezüi BJP national tir JP Nadda den New Delhi nung par kidang ajurutepa liasü.

IPFT lenirtemi JP Nadda nem tezüluba nung takhangba ka agüja liasü.

IPFT lenirtem aser JP Nadda na tsüingda minute 45 sensak sema liasü. Parnoki 2018 küm

Ministry of Home Affairs (MHA)-i tentetsüba High-Power Modality Committee dak sendakba nung sensaksemogo.

Parnokisa, 125th Constitutional Amendment Bill agizüka TTAADC nem tashi agütsütsü, Tripura Territorial Council tentetsüba, Kokborok oshi atema roman script amshitsü melatsü aser department balala nung ST aser SC atema mekazüka yuja aliba mapa tazüingtem süngdaksütsü asoshi Special Recruitment Drive ka agitsü asoshi benoka sensak asem.

BJP lenirtem aika Trinamool Congress (TMC) nung adentsü asatepdar ta osang adoker aliba mapang iba senden menogo. West Bengal Assembly elections nung takok tajung anguba sülen Trinamool Congress-i Tripura nung party asüingsashitsü atema merangdangar.

GOVERNMENT OF NAGALAND DIRECTORATE OF HEALTH & FAMILY WELFARE NAGALAND: KOHIMA

No. DHFW-523/TRG-NSG/2017/

/Dated, Kohima the June, 2021.

ADVERTISEMENT

In pursuance to Govt. approval No. MED-9/3/93/696 Dated, Kohima the 18th June 2021, interested candidates from bonafide Indigenous Inhabitants for the State of Nagaland are invited to undergo Training in General Nursing & Midwifery (GNM) and Female Health Worker (FHW) for the session 2021-2022 for the 4 (Four) Schools of Nursing in Nagaland as indicated below.

1. Minimum and maximum age for admission will be 17 - 25 years on or before 31st Jan 2021.
2. Application Form duly filled up along with necessary documents duly self attested may be submitted along with the Schedule Tribe and Indigenous Inhabitant Certificate which is compulsory for all while submitting the form.
3. No separate calling letter will be issued.
4. Application Form can be downloaded w.e.f 28 th June 2021 from the Department Website: nagahealth.nagaland.gov.in
5. Last date of submission of Application Form(s) online shall be 8th July 2021. Duly filled in application in PDF format along with requisite supporting documents should be submitted through email to: hfwr.recruitment2020@gmail.com
6. Course details-

A. (GNM) (School of Nursing, NHAK, IMDH Mokokchung, D.H. Dimapur)

- i. Male and unmarried Female candidates
- ii. 3 (Three) years course, 100 (one hundred) seats.
- iii. Qualification - Class 12 passed any stream with 45%, preferably Science

B. (FHW) (School of Nursing, D.H. Tuensang)

- i. Unmarried Female candidates.
- ii. Two years course, 30 (Thirty) seats.
- iii. Qualification - (a) Class 12 passed any stream with 40% from recognized English medium School Board.

(b) Class 12 qualified any stream with 45% from Recognised National institute of Open School.

7. No examination will be conducted. Therefore, selection of candidates will be purely based on academic performance (marks) in the qualifying examination.
8. No Application Forms will be issued from the Office.
9. Incomplete Application, if submitted will be rejected summarily. List of rejected application will be published in the Office Notice Board.

Backward Tribe Reservation Policy (25%+12%= 37%) of seats for undergoing GNM & FHW courses will be followed as per Govt. Notification No.RCBT-5/87/(Pt-II)/Dated, Kohima the 14th April, 2011.

(DR.Neikhrielie Khimiao)

Principal Director
Dte. of Health & Family Welfare
Nagaland, Kohima.



TIR YIMYIM

YIMOBILEM (EDITORIAL)

DIMAPUR ROGONÜ, AAMI (JUNE) 25, 2021

Kazütsüba mapang masü

I bai mokdangba (lockdown) mapang, tetezü asenok onüleni moudaktsüi shibanga yutsüba mapang, anungji kidang tsüraburi anir tanurtem ajak kecha meinyak chiyonga amongtsübaji tang mapangba ya lir. Ajsüaka, ita junga kecha meinyak kidang chiyonga amongtsübaji aikati makoktsü aser akokyonga aji jangratemtsüka masü. Ano, mokdangba ya koba anogo tashi nung koba yimya nung agientsüar memetet, anungji mokdang liaka mapang amajok nung meindoki nisung shia pei dak aketba sempet meteta mazüngi alitsüsa mapa kar apiteta inyaktsubaji kanga tongtibang kumogo. Aji oda, ki yanglushitsü alirtem atemabo ibai mapang tajung ka asütsü aser ki ana nung atsü anepalutsüsa tesem alirtem asoshia ibai aluyimba mapa angazüktsü mapang tajung ka asütsü. Talisa, kidang tanurtem asoshi ibai kanga takoksa anguba mapang lir, kechiyong joko taküm agi kümnabuba parnok kaketrejui moudang class tasen nung amentsüsa akümer. Ibaji aika atema taküm piyong asoshi tangazüktsü tim mangazük akoksar asütsü. Atangji, tanurtem ajak kidang nungi online class nung adener saka online class-ji tesayurtem den tejak ngutepa aser sensaksem teta agir masü saka school teimbaka sensaker asünungji, tesayurtemi notes zülur whatsapp nung yoker aser tatidang nunga itemji ajizüka zülur agütsür. Ano, online class-ji school-i tesayur aser tanurtem ajak tejak ngutepa aser kati ka den asüngdangtepa class agidi asüyonga, tanurtem aika ket nung smart mobile phone maka aser ano akayonga yimtak yimtsüng nung alirtembo network mangur ta, ka akadang ka maka aser ka angudang ka mangur ta timtem jenti ajurudagi. Iba ama mapang nung kidang tanurtemji odang metoktsüi tsüraburtemia koba tashi nung parnok yaritettsü ta bilema lesson nung aser parnok mapang amshiba nung yaritsübaji kanga tongtibang kumogo. Aji oda, tsürabur aser tanurtem aika asoshi, ashiko, iba mokdangba mapang ya kakat mezügnüi aliba to kakat azüngtsü sobaliba tajung ka tenzükba mapangang ka asütsüa akok. Kakatshir ka atemabo kakat azüngtsü yimya sübaba sobaliba tetka tajungbabo mali. Kakat mashi ka nunga shisatsü lir, anungji sShisatsü aser temetetba ajak ya kakat azüngba nungi tenzük. Aji oda, aseni kakat ka azüng nung, yang nung jagi kakat zülur dang nungibo asenang temetetba akümtsüsa shisatsü aika angur aser aseni asen dak temulunglem teta tasü tait nisung ka kümadoker. Ibayongji, tatidang nunga melamelaa takok angur aser peisasaa taküm lenmang tajung bushiteta mapa inyaker meinyakma yateta aoer. Iba denji kidang mapa inyaker meinyakma lir aser mapa shia jagi taküm lenmang (Life skill) sayur. Iba tangatetba nung tanurtem den külemi yakta saker kari soruchioker, kari ki aser kima aoker, kari ak an nem chi agütsür aser kari sü ashir ta anepdang mapa tema yur, ano anüngdang kari sü arür aser kari süng mapa inyaker aser karbo atsü aser farm anepalur ta asen kinungertem ajak kodang kanga mazüngi mokdangba anogotem ya süidaktsüdir, asenok asoshibo iba mokdangba mapang ya skill training agiba mapang amatoang ka kümadoktsü. Atangji, memokdangyonga asenok aikati mapa mangur, anungji mapa maka ta bilema chiyongli kazüli, chiyongli kazüli ta tambur tantsür küma kidang tsürabur nem mesüdaktsür aser ano tsüraburtema karbo, pei apuani nem mesüdaktsüba rogo lir. Ajsüaka, asenoki mapa maka ta bilembaji nüpkokeri alima mangu amai, mapabo lir ser nung asenoki mangur, anungji mapa angutsüsa asen tenük lapokjang ta Tsüngrem dang ashitsüla. Aji oda, asenoki asenoksasa iba mokdangba mapang ya mapa inyaker angazükba mapang ka kümdaktsütetra, mokdangba mapang ya lapokdangbo, asenok training institute tajung ka nung course tajung ka tema azüng amai kümer, mapa inyaker meinyakma asen jakdang angutsü. Ashiko, idangjibo aseni mapa bushitsü masü mapaiang asen bushia arutsüa akok. Iba ama takümji aseni asensasa yanglutettsüla.

OLEMSABANG

KOTAK TASEN ASER ALIMA TASEN

- Süpongñüsang Longkümer, Darogapathar Dimapur

Meteorological Department ajanga mapang shia alima nung kechi ataloktsü ali aji nüpurtem dang jilia kümtanga alitsü metetdaksür, aser yamaji tesüm ka nungposa temaitsü tila kaposa ataloker. Mathi 16:2-3 Tsüngsang ajungtsü majungtsü nenoki anüng terprangtsü agi ratettsü akoker ta Yisui shia lir. (Sünglijang aser tsük züngyazüngtsü adaktetta ayuba dang Metsü ta ajar, saka ano metsü tanang aonsana nung inokba tena ya bendanga ni zülunür, aonsana nung inokba ya Tzüyim nungi timba adoker aser ano tzü akümer anungji ibai Metzü "Z" amshi nung jungdisü tatamasa shitanger kechaser tenaprongla "S" amshiba ya oren agi bendanger ashi tangar kinipo ya kechiba ta asüngtanger.) Metsü tsüngküm ya küm piyong lir, Tsük atema, sünglijang atema, ansutsü atema, jipi atema, Alu atema, item ajak ya bei mapang shidak nung tsünüsempongra ajak tajung aror aser aonger. (Come aru Harves aro ya-a bendangtsüla) Saka mapang shidak nung metsünüra züsena belembaji amajok. Iba mesük Tsüngrem o sayusüngira mesüra prokra nüpurtem asoshi kanga tang temoatsü angur, saka mapang ten aret Tsüngrem o asüyonga tejimbirji amajok nung mapang endoker asütsü. Yisui alima tatem mapang aser temaitsü indang jembiba Lai tapu aisü nung angur. Anungji tamajungba mapang nung asen dak mekongshidaktsütsü amanga sarasatema alitsü, aser tongtipangsa tangar atema sarasatemsütsü nüngdaker.

Jongkai adok 21 nung Tsüngremar mapang Kotak tasen aser alima tasen jangratemtsü ka azünger aser angatetdaksür. Ibai azüngdang tepela agi nüktzü yima azünger. Amangbapurtemi tiyimla tulu nung iba Lai züngjen azüngtsüla. Saka alima kintem yimsüsürtemi alima ajonga tamangba yimsü ka, Sen ka, shishilembaba ka küma alima tasen yangluti ta süra ajipo jongkai adok tapu 13:1-18 Yisu kangki nung südaktsüba mapang koba yimli-I yimsü süa liasü aser pai Yisu kanga atala-a südaktsü iba lima ya tenem tenet agi mekütbanga lir ta ashir, pa ten Kin tult ter longjemtsü aser Yirusalem makdoktsü merangtsü. Iba mapang tamangba ka, senotsü ka, shishilembaba ka, aser iba nung adenür ajak temaitsü ka 666 ataloker asütsü. Kechaser tawa tanüa Aadhar card malirpo jang-a mangur Covid Vaccine-a metotsür yamaji tanemi tanemi alena arudake ta tanü asenoki ajangshiba kar lemsateper. Tekong 9,10 Shiba tenarong aten pai angang. Nisung kar tepoktsü lira, pa tepokba tiyai aitsü; nisung kar nok agi lepsettsü lira pa nok agi lepsetdaksütsü. Idakji temeshipur asishi taremsük aser tamang tenüngdaksü. Tamang sarasatem agi ajak akoktsü sürnung tekülemi aotsüpo yutsür kima yimtung nung sarasatema jajatsü tsüputepber, iba tamang agi tizüktettima ta sasar. Aipelena zülua lira metongshijang junger ta bilemra tazünger ajak Tsüngremi moajangma.

AO KIN CHRISTIANTEM LONGJEMTSÜLA

- Talitemjen Imchen

Tir yimyim June 21, 2021 olem sapang (olemsapang) nung Dr. Meyu Changkiri (Shillong) ajanga, INDIA KIN AJAK HINDU YIMSÜSÜBA KÜPOK LIDAKTSÜTSÜ TASA METETBA onük ngua nibo kanga dang tsüratema züngogo. Kasa tebilemstüji Ao kin christiantem telongtet nunga lir. Yimya agi tangar tenük nung anak aliba tama jangjaa angur aser meteter. Kechiaser tangar asoshi asen ji tenü dangtsü lir aser asenok asoshi tangar ji tenü dangtsü lir. Asenoki India kin ajak hindu yimsüsüba küpok lidaktsütsü tasa metetba amaji, parnoki mashir dangashi asen daka achiteta alitsü.

Aortem 1872 küm nungi pangdak (officially) süa Christian tamangtsü (religion) agizüker amangyonga arur. Laishiba nungji mezüngsüa nisung yanglubaji Adam aser Eve tena tenüng tetshia lir. Saka tanü tashi netsüng dang masü, long nung apoker Laishirtem aika dang lir. Item long nung apoker laishirtem jagi, parnok Laishiba dangi meyipa aotsü asü mesüra christiantem ji anisatsüar na ta Yoki Adityanath, Vishwa Hindu Parisad (VHP) amala, jagi repranga alitsü akok.

Ni long nung apoker chir ka asünungbo, nibo Christian tsüsenba züngsem meyipa agiadoktsü aser arogo nungia atsünginadoktsü. Adangji nung long nung apoker ka aser long nung mapoker ka, temelong ana külemi tekülem kidang mener Laishiba o anga Tsüngrem nüngsang ken atentsü kanga tasak. Ni aiben shisadangba kaji, Tsüngrem-ia nisung anaji koma repranga alitsü.

Christiantem-i Laishiba dangi meyiper, onük tajungba dangi meyiper, tenla agütsütsü temelongtet tuluba meyiper, sarasadem taretba dangi meyiper, telok telok tasen balala tenteta tekülem akangshia meyiper. Saka aiben Tsüngrem-i melongba nung masü nisungi melongba nung timba meyiper alir. Sarasadem dang o tajung aika shiteter, saka nisung yongtsü nung o tajung aikabo meshiteter. Alima ajonga nung sarasademba ola ya, netsüng yongzük asadanga reprangtep ka asünungbo, Aor timba asütsü amai. Saka asen temelong ajongai sarasadem asü, Tsüngrem-i angutsü tsübua onük karbo mima yur sarasadem agi kanga shisadangtsü tenüngdaksü.

Nisung ka taküm nung revival küm shia agiyonga, aika asoshi telok nung revival agir aser magir ajak kasa dang akümer. Alima dangji, ajak azü dang jajar nung ta tenüng temer, jakla adokdangbo ajak kasa dang adoker. O tamajung jembidangbo ajak kasa dang jembir. Revival agir alirtem-i ajemalua tensa mapang aremsükba angubajibo kanga dang ajema lir. Ashiko pa/lai revival agiba bilemteta mitmepang nung, revival bilemteta jembishinütetbajibo noklang shilem nung ka mesüra ana dang asütsü amai.

Joko asenok tangatetba putu dangi meyiptsü junger. Na aser ni inyaktetba tajungji Tsüngrem tsüngdang tagizüktettsü asütsüla. Na aser ni jembitetba tajungji Tsüngrem tsüngdang tagizüktettsü asütsüla. Ne medemsang aser medemla indang otsü na aser ni jagi jembibaji, pa/la alidanga kasaji jembitettsüla aser pa/la jagi tagizüktettsü asütsüla. Iba sülenji dang Ao Kin Christiantem Longjemtetsü aser Tsüngrem-i asenok tali meimtsü kü pongmangbo lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Telangana nung police ket nung lia Dalit tsür Khristan ka asü



2019 kum August ita nung New Delhi nung Dalit Khristantemi linük nung senso ajak nem kasa temeden agüjang ta takhangba agüja longkak aitba noksa nung angur.

June 24, 2021: India kübok Telangana state nung police-i reshikangshiba ajanga Dalit tsür Khristan ka süogo, ta osang ka ajanga metetdaksü.

June 17, 2021 nü Telangana kübok Yadadri-Bhongir district nung police-i Khristan tsür, Ambadipudi Mariyamma aser lar jabaso, Udaykiran na pua liasü; lai auya, ta la nem mapa agütsürtemi la nem tai tongloksüba nung ajemdaker la apu.

Lar jala, Swapna aser lar kinüngertemi, la police station nung reshikangshiba ajanga asü, ta police nem tai tongloksüogo.

June 18, 2021 nü police station nung arrshi kum 44 Dalit tsür, Mariyamma süchia aoba sülen la hospital-i anir ao, ajisüaka yangji aliba doctor temi la tasü bener aru, ta metetdaksü.

Osangbener den jembidang

taoba mapang Indian bishops' office of Dalits & backward classes nung secretary, Z. Devasagaya Raj-i, "America nung tanak nisung ka tepsetba sülen parnok 'Black Lives Matter' campaign tenzükba mapang nung yangia (India nung) nisung kari 'Dalit Lives Matter' campaign tenzuka liasü. Iba campaign ya ano tesashiba akümtsü mapang tongogo," ta ashi.

Khammam nung aliba Apostolic Christian Assembly Arogo nung pastor, Sudarsan Masih-i, "Iba tatalokba osang angashia ozü züngsemtem aoksar. Onoki lar kibong atema sarasademtsür, aser iba tatalokba jungjunga bushisüngdangba sülen aibelenertem nem temerenshi agütsütsü atema onoki sarasademtsür," ta ashi.

"Sorkari sensakertem aser

meshimejungertem nem temeden agütsütsü atema inyaksüla, yamaji mesüra nüburtem melungjang nung tetsübu alitsü," ta pastor-i ashi.

Yaküm National Campaign Against Torture (NCAT) report ajanga ashiba agi, India nung 2019 kum police ket nung lia nisung 1,731 asü (judicial ket nung lia nisung 1,606 aser police ket nung lia nisung 125 asü).

NCAT director Paritosh Chakma-i, "2019 kum police ket nung lia asür nisung 125 nungjagi nisung 75 (shilem 60) bo sensaker aser meshimejunger kibongtem nungi lir," ta metetdakja liasü.

Dalit nunger ya Hindu nunger society nung kanga teküboktiba 'caste' lir. Tesüiba kum aika tsüngda Dalit nunger aikati Khristan aser Islam yimsü dangi meyipogo.

ANOGO ABEN TSÜNGREM DEN

Ni langka angazüksüla

Maka mait indang ni jembir masü, kechiaser kechi tia nungsa ni lidir, iba nungji temulung chia alitsü ni angazükogo. Filipi 4:11

Temulung achibaji langka yimya nungi aruba masü saka ibai angazüksüla. Paul taküm nung teperi kaa aliba mapang liasü. Aikati ashir parnok teperi kaa lira temulung asütsü. Saka nai tekong 12ji züngra Paula maka-mait, machi-majem tia nunga liasü ta angur. Kodang pa Filipi tepuokdak liasü, pai mulung masü jembi asü? Pai Tsüngrem tenüng sanga ken dena liasü (T.M. 16:25). Iba dangji temulung asüba ta ajatsü akok.

Na kechi maka iba nung ranglokba dang temulung asüba ta majar. Na makaba nai aginüra iba dangji temulung asüba ta majar. Na temulung süa mali. Saka shidakba temulung asübaji na kechi aka iba nung ranglokbaji lir. Na chiyongtsü aser aben süoshi kar asü? Aji lira temulung süa liang (1 Timothy 6:8). Alima nisung aika ibajia maka lir. Na Laishiba kar asü aser nai kong külemner idakji külemtsü nüji kar asü? Aika iba ama inyaksü nüji maka lir. Na chiyongtsü, aben-süoshi kara, aser nai mulung dak külemtsü nüji kara, na Tsüngremi kanga moatsügo. Khristan ka ama na kotak nung teti tatem maka mapang indoktsü. Ibai teti tatem maka temoatsüji lir. Item temoatsütem yur, na kechi maka iba nung rangloksü kecha kuli mali. Na Paul ama alitsü akok aser temulung süa alitsü angazükang.

Oba, tanü ni makabatem nung merangloksü, saka ni akaba temoatsütem nung rangloksü kü dang yariang. Amen.

South Baptist Convention-i China nung Uyghur nunger tepsetba aitsür

Nashville, June 24 (Agencies): Tawa Nashville nung Southern Baptist Convention 2021 senden nung China nung Communist sorkari Uyghur aser lispor Muslim nungertem anema inyakba aija bangzüng ka renemogo.

Southern Baptist Convention (SBC)-i Chinese Communist Party (CCP) dang linük nung Uyghur nunger jenti tepsetba anenang, aser parnok nem Tsüngremi agüja aliba temeden agüjang, ta bangzüng renem.

China nung Ughyer nunger ya timbaka Xinjiang Uyghur Autonomous Region nung alir.

SBC-isa US sorkar dang linük nung Uyghur nunger refugees ama agizüksü, aser parnok jenoka alitsü atema nungdakba teyari agüjang, ta mepishi.

SBC bangzüng ajangsa, China nung reshikangshi tia nung aliba Khristan mapa inyakterem aser Khristantem atema sarasademjang, ta mepishi.

Mongolbarnü Nashville nung SBC senden nung adener messenger 1,500 nem iba bangzüng agütsü. Bangzüng nungji China nung Communist Party-i Uyghur nunger reshikangshiba osang tejangja shia lir- item rongnung Uygher nunger kangshia tanur raksaa indoktsüba, tashiyim amshia raksatsüba, tanur masotsü atema sterilize sütsüba, temang shilem agiba, nisung shibelenba aser



June 15, 2021 nü Music City Center, Nashville nung Southern Baptist Convention (CBC) senden agidang tangokba noksa nung angur.

parnok dak scientific experiment agiba densema lir.

Osang angazükba agi, anüolen China nung Uyghur Muslim nunger million 1-3 shi internment camps nung puoka lir, aser item camp nung parnok dang secular senso kaka asütsü aser Communist Party anema menokdaksü tesayuba agütsür.

Madison, Georgia nung aliba Madison Baptist Arogo nung pastor, Griffin Gullede-i, iba bangzüng renema benoka liasü. "Uyghur nunger reshikangshiba ya alima nung tatalokbatem rongnung tamajungtiba lir," ta pastor-i ashi.

Osangbener den jembidang pastor-i, "Iba ya lispor merüktetba lir. Iba ya nisung jenti tepsetba lir. Asen akümüli nung Uyghur nunger reshikangshiba yabo khenyongi balaka. Item

ajunga ya China sorkar ketdangsuba kübok ataloker, saka shingai ola madoker. Asenoki ola adoktsüla," ta ashi.

Parnok ya kanga tezülen alir, ajisüaka China ketdangsertemi technology amshia Uyghur nunger anema inyaker. Ketdangsertemi cameras, facial recognition technology aser DNA samples bendena tendangba ajanga Uygher nunger jangjar.

Uyghur nunger reshikangshiba aitsüba ya SBC indang theological mission den sendaktepa lir, kechiyong Laishiba nung Yisu tashi angatsü aser alima tesem ajungalen Khrista osangtajung proktsü atema shia lir, ta Gullede-i ashi.

"Baptist (SBC)-i shilem agia inyakba mapatem rongnung tulutibaji religious freedom lir. Iba atema asenoki inyaksüla.

Religious freedom ajanga alima nung osangtajung proktsü atema kishi lapoktsür. Baptist Khristantem atema tongti teinyaksü mapa anaji religious freedom aser alima nung osangtajung proktsü mapa lir," ta pastor-isa metetdaksü.

Mongolbarnü iba bangzüng mebenokdang Gullede-i Uyghur nunger temeden atema inyakba telok aika ajurua jembia liasü.

Gullede-i ashiba agi, New York Times osangkaket nung pai ocet ka nung Uyghur nunger reshikangshiba züngshiba sülen pai Uygher nunger atema inyaksü jangra tenzuka liasü.

Iba mapang nungjagi tenzuka Gullede-i twitter ajanga Uygher nunger indang osang aika lemsatepa arudar.

"Tanü putu putiotsü nung meimchir temeden anema

Chima-i tamajungtiba inyaker, aser asenoki iba atemaji ola madoker, kechiyong ibaji ajanga linük aika rongsenkettsüng tsütsü tajangzük angur," ta pai twitter ajanga lemsatepa liasü.

Iba sülen mapang tatsüka dang lirbo SBC indang Ethics & Religious Liberty Commission-i webinar ka ayongzuka China nung Uyghur Muslim nunger reshikangshiba tebilemstü onük nung o lemtepa liasü.

Webinar sentong nungji taoba mapang U.S. Ambassador-at-Large for International Religious Freedom, Sam Brownback-a aden.

Yaküm webinar sentong nungji jembidang Ethics & Religious Liberty Commission nung taoba Tir, Russell Moore-i, China nung minorities anema inyakbaji alimai mangu amai dang toktsür, ta jembia liasü.

Taküm kum tetenzüklen U.S. State Department-i China nunger Uyghur nunger anema inyakba ya "genocide" lir, ta sangdongogo. Joe Biden administration kübok US Secretary of State Antony Blinken-ia China nung Uyghur nunger anema inyakba ya asalentong yanglur nisung jenti tepsetba lir, ta aitsüogo.

Pastor, Gullede-isa alima nung Khristan teloktem aser melungtet teloktem dang SBC-i inyakba ama Uygher nunger anema ola adoktsüla, ta ayongzük.

OLONG PAITEP # 5855

1		2		3		4	5			
				6						7
		8								
9				10		11				
			12					13		
						14				
16						17				

TIPILEN 1. Nisung jenti - (5) 4. Tsük rudenba - (5) 6. Temzüng tesashi - (5) 8. S _ _ _ i - (3) 9. Nisung telesa - (3) 10. Anogoshi - (4) 12. Ajanga aor - (4) 13. Tsük rizüngdak - (3) 14. Tebang nungi adokba - (3) 16. Süngdong tatembangtiba - (5) 17. Meputep - (5)	LANGTSÜNGLEN 1. Tenük telong - (9) 2. Committee dang ajar - (5) 3. Yagi ki okdoker - (7) 5. Yim lenmang - (5) 7. Temoatsü keter meyipa aruba - (9) 11. Kanga junga menemba - (7) 12. Majinü - (5) 13. Tzüma nung senzüba - (5)
--	---

OLONG PAITEP # 5854 TELANGZÜBA

TIPILEN : 2. Bangsemo, 6. Tiptem, 8. Jen, 9. Talila, 11. Aren, 12. Tzübo, 14. Alia, 16. Angati, 17. Odi, 18. Azü, 19. Sünglang.	LANGTSÜNGLEN : 1. Yipten, 3. Nüja, 4. Sangro, 5. Milen, 7. Tulu, 10. Laza, 11. Aben, 12. Tiyong, 13. Ajizük, 14. Aitsü, 15. Tasa, 16. Aina.
--	---



YIMSÜSÜR KATI ALOKBA DANG KANGA JASHIR

Alokba : Hai... 'Yimshishir' -ba...Koda junga dang lir sudi-do...??? Mapang shia Yi agi meseper lenru/kilentsü ajak nung manglong mejanga alisang...!!!

Yimsüsür : Hai ... Alokba ajungyonga-majungyonga asen yimdak onok yimsüsür ado... Nai kodaser 'Yimsüsür' ka dang mezüngmeshia 'Yimshishir' ta ajar...??? Na asüng-yanu yim-salangi jaoka senchi achi-ja nooo...Renema liang.

Alokba : Ayyye... Ni yimsüsür shinga mezüngmeshi masür ako...Na aonung shia Yi agi meseper...kilentsü o lenru ajak nung manglong longdaka mejanger...teni-tebanglen ajak nungi kechi-kechi yimshishir...tetsünglen nungia natsü-a napeta yimshishia ajuruba agi...Ne dang 'Yimshishir' ta ajar-ba dang ako...Yimsüsür ka sur teti yi agi meseper senzübaji ...Na tamasa Ak tuluba ka achitsüba adiii.

Yimsüsür : Ayyyyyaaooooo... Ajibo auer süng-sü tuluba amai ado...!!!!!!???????

Lilir : L.Kika Pongener.

TANÜBO NAI LANGZÜANG

Q. Shenzhou-12 Manned Mission ya ____ meyong lir.
A.China B.Russia C.Japan D.India


===== (Taruba adok nung onoki langzüsü)

YASHI ADOK TELANGZÜBA : 5

AO OSHI ANGAZÜKDAK:
TANÜ ANGAZÜKTSÜBA OJANG

Kara
(n) au nükti nung wara aketba (bamboo limb)
* Au nung **kara** aliba agi tetsüng jajatsü yanglur.

Kasasa
(adj) saku, tebandang mali (equal)
· Kütsüi onok nem chiyongtsü **kasasa** lempzüka agütsür.



NAI-A YA METETTER MA?

EURO 2020 ASAYAMUNG NUNG GOAL TIMTIBA IDAKTSÜR ALIRTEM:

PLAYER	TEAM	GOALS
- Cristiano Ronaldo	Portugal	5
- Patrik Schick	Czech Republic	3
- Emil Forsberg	Sweden	3
- Romelu Lukaku	Belgium	3
- Robert Lewandowski	Poland	3
- Georginio Wijnaldum	Netherlands	3
- Memphis Depay	Netherlands	2
- Ciro Immobile	Italy	2
- Xherdan Shaqiri	Switzerland	2
- Andriy Yarmolenko	Ukraine	2
- Roman Yaremchuk	Ukraine	2
- Ivan Perisic	Croatia	2
- Manuel Locatelli	Italy	2
- Yussuf Poulsen	Denmark	2
- Kai Havertz	Germany	2
- Denzel Dumfries	Netherlands	2
- Raheem Sterling	England	2
- Karim Benzema	France	2

SUDOKU # 5896 TELANGZÜBA # 5895

3	1		6	2			5		3	1	7	4	8	6	2	5	9	
		6					7	3	1	9	5	6	7	1	2	3	8	4
		8			1			6		4	2	8	9	3	5	7	6	1
9			4	7				8		2	3	5	6	9	8	4	1	7
8	7						9	1		7	8	4	1	2	3	5	9	6
			9	8				2		6	9	1	5	4	7	8	2	3
	5	9	8	4	3		2			5	4	3	2	6	9	1	7	8
	3	2			6			4		1	6	2	8	7	4	9	3	5
4	8		2	7	5	6	9			8	7	9	3	5	1	6	4	2

OJANG LUTEP # 5440

IMALA :

NGNU :

TÜMAK :

JIKA :

SAÜNYUTSGI :

GIA :

NGBDAO :

IRMAL :

ALILIA :

ETELITR :

OJANG LUTEP TELANGZÜBA # 5439

MEDEMERTEM JEMPIBA MANGAI PEI BILEMBA DANG INYAKBAJIA KANGASA TAJASHITSU ULURA

TAN HOPTA ATEMA - KOMA SÜLA ?

Q. Food & Civil Supply department nungi Relief jang ya magütsü anen nunga koma süla ?

Delimitation sülen Kashmir nung election agitsü: PM Modi



June 24, 2021 nü New Delhi nung Ato kilonser, Narendra Modi leniba nung Jammu & Kashmir nung yimtenren party balala nungi lenirtem den senden amenba sülen tangokba noksa nung angur.

New Delhi, Aami/June 24 (Agencies): Brihostibarnü New Delhi nung Ato kilonser, Narendra Modi-i Jammu & Kashmir nung yimtenren party balala nungi lenirtem den ghonda asem shi senden menogo; 2019 küm Jammu & Kashmir nung Arrla 370 agienba sülenbo tang mezüing pai J&K nungi lenirtem den senden amener.

J&K nungi lenirtemi ashiba agi, Ato kilonser Modi-i Jammu & Kashmir nem state jenjang agütsütsü aser yimtenren inyakyim tenzüksü, ta shiogo.

Centre sorkari Jammu & Kashmir nungi party tem dang, tang Centre yimsüstüba kübok Jammu & Kashmir nung terenlok kanga kaogo, aser item rongnung tang mezüing block-level elections agiba densema lir, ta metetdaksü.

Senden tembangba sülen osangbenertem den jembidang Jammu & Kashmir People's Conference nungi lenir, Muzaffar Hussain Baig-i, "Ato kilonser, Modi leniba nung amenba senden nung adeneritem ajaki Jammu & Kashmir nem tanaben state jenjang agüjang ta takhangba agüja liasü," ta metetdaksü.

"Senden nung J&K lenirtemi benokba onük ajakji Ato kilonser Modi-i kanga nendak-nendaka angaba sülen pai telangzüba agütsü," ta Muzaffar Hussain Baig-isa ashi.

Tarutsü nung J&K nung assembly elections ayongzüka agitsü atema mapang memetdaksü, ajisüaka delimitation maparen tembangba sülen Kashmir nung election agitsü atema inyakyim

tenzüksü ta Ato kilonseri shiogo, ta paisa shisem.

Arrla 370 dak sendakba nung pai, "Iba onük ya Supreme Court nung benoka lir, anungji iba atemaji o lemteptsü menüingdak," ta ashi.

National Conference lenir aser taoba mapang Jammu & Kashmir Chief Minister, Farooq Abdullah-i, "Jammu & Kashmir atema tamang katettsüji kanga nüngdak. New Delhi tsütsülen nungi tamang katettsü atema mezüingbuba meraji Jammu & Kashmir nem state jenjang agütsütsü," ta metetdaksü.

2019 küm August ita tetenzüklen Jammu & Kashmir nung Arrla 370 agiena union territories ana kümstüba sülen tang mezüing Centre aser Jammu & Kashmir nung yimtenren lenirtem tsüingda senden menogo.

SCO nung Ajit Doval-i kiralong-rartem anema inyaktsü mepishi

New Delhi, June 24 (Agencies): Bodhbarnü Shanghai Cooperation Organisation (SCO) senden nung India national security Advisor, Ajit Doval-i Pakistan nung amenoka aliba Lashkar-e-Taiba (LeT) aser Jaish-e-Mohammed (JeM) ama kiralongrar telok balala anema inyaktsü mepishi.

SCO NSAs senden nung pai, item ama kiralongratem anema inyaktsü atema SCO framework nung renema lir, ta metetdaksü.

LeT aser JeM nati India nung, talisa union territory of Jammu & Kashmir nung kiralongra jenti inyakogo. Pakistan ISI-i yarisema JeM telok ya tentet, aser iba teloki Pulwama amakba mapang nunga CRPF sepai 40 tashi tepsetogo.

SCO senden nung Pakistan NSA, Moeed Yusuf-i dena liasü.

Senden nung India-i UN bangzüngtem shidak inyaktsü aser UN-i sangdongba kiralongratem aser kiralongra teloktem anema inyaktsü nenshia metetdaksü.

UN-i kiralongratem, ta sangdongba telok timbaka Pakistan linük nung lir, ajisüaka

Pakistan ketdangsertemi kiralongratem anema meinyaker. Tajik Capital Dushanbe nung ayongzüka SCO senden nung India NSA, Ajit Doval-i kiralongra tapu balala ajak sashia aitsüba den külemi arrtsü adener kiralongratemji ochi obendangdaki anir arutstüla, ta metetdaksü.

Senden nung Doval-isa Chahbahar, INSTC, Regional Air Corridors ama connectivity projects ajanga rongsenkett süng tsütsü tajangzüik anguba den külemi linük tsüingda tamang kateter, ajisüaka connectivity ajanga sorkar aser litsü akhümtsübutstüla, ta ashi.

China nunger infrastructure programme- China Pakistan Economic Corridor (CPEC) yagi Pakistan-occupied Kashmir (PoK) amshir, aser iba atema shisabulua India-i China dang iba project ashishiba aiben metetdaksüogo.

SCO senden aliba mapang nungsa jurila senden ka nung Doval-i Russia NSA, Nikolai Patrushev den ghonda ana shi senden amendang linük ana dak sendakba onük aika nung o lemtepogo.



Surat, June 24, 2021: Ato kilonser, Narendra Modi nem tenüing jasatsüba ken o dak sendakba nung Brihostibarnü Congress Party lenir, Rahul Gandhi Surat nung aliba magistrate court kati aoba noksa nung angur.

India nung nisung 54,069 dak Covid putet aser 1,321 asü

New Delhi, June 24 (Agencies): India nung ano nisung 54,069 dak coronavirus putet aser iba tashidak agi shiranger 1,321 süogo, ta Brihostibarnü Union Health Ministry-i metetdaksü.

Tang tashi nung India linük nung nisung 3,00,82,778 dak coronavirus putetogo aser iba tashidak agi shiranger 3,91,981 süogo.

Tang linük nung coronavirus agi teshirangdakpur 6,27,057 dang kümogo aser ibaji

coronavirus caseload nungi shilem 2.08 dang lir.

Brihostibarnep 7:00 ako tashi nung India nung coronavirus vaccine dose crore 30.16 agütsüogo aser iba nungi tsüüba ghonda 24 tsüingda dose lakh 64.89 agütsüba densema lir.

Anogo shia positive putetba shilem 2.91 dang kümogo aser hopta shia positive putetba shilem-a 3.04 dang kümogo, ta Health Ministry-i metetdaksü.

Linük nung coronavirus tashidak agi shiranger

2,90,63,740 anepogo aser iba tashidak agi shiranger asüba shilem 1.30 kümogo.

Bodhbarnü samples 18,59,469 tendanga liasü aser tang tashi nungbo samples ajak senteper 39,78,32,667 tendangogo, ta ICMR-i metetdaksü.

Tesüüba ghonda 24 tsüingda coronavirus agi nisung 1,321 asü aser nisung timba asüba state temji Maharashtra (508), Tamil Nadu (166), Kerala (150) aser Karnataka (123) state tem lir.



June 24, 2021 nü Bhopal nung Madhya Pradesh Chief Minister, Shivraj Singh Chouhan (abelen nungi tanabuba), State BJP Tir, VD Sharma (ajichilen nungi tanabuba) aser party lenirtem state BJP Working Committee senden nung adendang tangokba noksa nung angur.

MP aser MLA temi Covid vaccines agitsü atema ajungshitsüla: Om Birla

New Delhi, June 24 (Agencies): Lok Sabha Speaker, Om Birla-i MP tem, MLA tem aser public lenirtem dang nüburtem nem coronavirus vaccine indang junga angatetdakja vaccine agitsü atema ajungshitsüla, ta metetdaksü.

"Iba wara nungi nüburtem kümzüksü atema assembly, legislative council, panchayat aser municipality ama institutions nung lenirtemi coronavirus indang angatetdaksütsü atema public awareness campaigns ayongzüka agitsüla," ta Lok Sabha Speaker-i metetdaksü.

All India Presiding Officers Conference nung jembidang Birla-i, "Vaccine dak sendakba nung nüburtem ratamadar, anungji vaccine indang junga

angatetdaksütsü atema Public lenirtemi meranga inyaktsüla," ta ashi. Iba sentong ya video conferencing ajanga agia liasü.

"Vaccine atema awareness campaign agitsüji kanga tongtibang, kechiyong Centre sorkari linük tesem ajaklen arrshi küm 18 ser temapurtem atema angati vaccination programmes tenzükogo," ta paisa metetdaksü.

Senden nung pai Presiding officers dang, Kota nung coaching institutes-i coronavirus wara ajanga tsürabur anaprong asür chirnurtem nem angati coaching agütsütsü, iba denji külemi tanenzükdak agütsütsü, ta metetdaksü.

Lok Sabha Speaker, Birla ya Rajasthan kübok Kota nungi MP lir.

Canada nung ano leper aika ngutet

Ottawa, Aami/June 24 (Agencies): Saskatchewan nung taoba mapang residential school ka alidak tenung zülua maliba leper noklang aika ngutet, ta Canada nung aliba lisopur telok kati ashi.

Iba ngutetba ya Canada nung tanü tashinung tongtipangtiba ka lir, ta The Cowessess First Nation ajanga Bodhbarnü ashi.

Saka parnoki leper kwi ngutet, iba indang tejangjabo mashi.

British Columbia nung iba mesük residential school ka nung tanur 215 indang leper nguteter hopta ishika lir iba osang ya angashir.

Lisopur lanurtem anidena nüburttem den yimyaliru kasa kumdaktsüsü nükjidong nung Canada sorkar aser tamangba yimsü tsütsü ketdangsurtemi Century 19 aser 20 mapang iba amala boarding school ya lapoka liasü.

Saskatchewan nung aliba Marieval Indian Residential School indang leper nung tenung zülua maliba lepertem ngutettsü mechi Cowessess ajanga taoba ita nungi ali telung tashi aluba radar amshia arur.

Item leper ngutetba ya tetsübutsü aser taoksatsü lir, ta Cowessess ajanga ashi. Brehostibarnü osangbener senden ka nung iba telok yagi leper indang osang tali tejangjaba metetdaksütsü lir.

Item leper ngutetba ya temolung shirangtsüka saka taoksatsübo masü, ta Assembly of First Nations indang national chief, Perry Bellegarde-i ashi. "Tang iba ama temolung shirangtsü mapang Canada nung er ajak dang First Nation den nokdaksü ni ajungshir," ta pai Twitter nung zülutsü.

1863 aser 1998 tsüngta lisopur tanur 150,000 dak tema pei kidang nungi anir oa iba amala school tem nung yuja liasü.

Tanurtem ya par oshi jembitsü memela mesüra par sobaliba mamshidaktsü, aser aika anepalua mamshi.

Iba yimya agi kongshiba indang bushitsü atema 2008 küm tentetba commission ajanga lisopur tanur aika pei kidangi meyipa meshilang, ta nguteta liasü.

2008 küm Canada sorkari iba yimya atema tatok meshia liasü.

Hong Kong nung Apple Daily dang tatem salem shiogo



Hong Kong, Aami/June 24 (Agencies): Hong Kong nisung meyirijang aika democracy busema adokba Apple Daily osangkaket tatem bang adok alitsü nungtepa liasü, koba küm 26 sülen kishi shibang.

Aonung sangwa nisung noklang aika tzunglu aja iba office kima adenshi, kong copy million ka menünga liasü.

Iba osangkaket yagi national security law nung aibelener ta tai tonglokja iba company indang rongsen soita ayuba mechi osangkaket ya shibangtsü telemtetba agia liasü.

Iba osangkaket shibangba ya Beijing talenba kübok press

freedom nung tebilemtsü tulu aliba sayur.

Anepbongi yimti tesem ajungalen news stand tem nung iba osangkaket adok tatem bangba copy azüngtsü atema nisungtem nokdaka liasü. Anepdang 10:00 ako (par mapang) tashinung tesem aika nung iba osangkaket ya yokmar liasü.

Iba osangkaket tatem bang adok ya tazünger nem tetushi agütsüba liasü, kong "Hong Kong nüburttemi tzunglu aja temolung shiranga tatem salem ashi" ta zülua liasü.

"Ibai tendak ka atemba amai bilemer. Hong Kong-i kechiba osangkaket ka melidaksüner ni

mangater," ta iba osangkaket busemer San Tsang-i osangbener dang ashi.

"Ni tatem tashi busema nokdakner. Iba osangkaket yagi küm aika lokti den külem sür aruogo. Iba sülen asenoki yipru ajangettsü," ta Amma Yeung-i ashi. Company ajanga iba osangkaket shibangtsü sangdonger ghonda ishika tsüngta Bodhbar aonung tzunglu aja nisung aika office kima adenshia liasü.

Parnoki tejashi lemsatempa phone indang flashlight tem tsüklok aser parnoki "totzü inokjang" ta yimyim ayima liasü, koba Hong Kong nung kanga nungtugu tajunghi o ka lir aser iba tetetzü 'maneni nokdakang' ta ashir alitsü.

Item ya ngua Apple Daily nung inyakertertem office nungi kilem aser kijiba leni arua flashlight yaloktsü aser "Kanga pelar Hong Kong" ta ayimoktsü.

Apple Daily ya Hong Kong nung democracy busemba osangkaket tulutiba liasü, koba sorkar anemer ajemreptsü merangba atema tetsükdaktsü ka ama Beijing-i züngshir.

2019 küm nungi tenzüka danga linüktem dang Hong Kong aser mainland China nem tenokdangba agüjang ta article 30 dak tema zülua liasü, ta ketdangsurtemi tai tonglokja taoba hopta police temi iba office mita bushia liasü.

Iba yongji company den sendaktepa aliba rongsen soita ayu aser ketdangsurtem kar apu. Iba osangkaket tentetsang Jimmy Lai ya tepokdak yua lir aser security law kübok pa anema ken o benoka lir.

Taoba Philippines tir Benigno Aquino süogo



Manila, Aami/June 24 (Agencies): Taoba Philippines Tir Benigno Aquino III mapang tatsüka shiranga arur süogo, ta osang balala ajanga ashi aser mapang tatsüka lir par kinungertemia ashi.

Osangbener temi ashiba agi Aquino ya tesüiba ita pongu tashi dialysis agia aru aser tawa temolungjang surgery agi. Pa ya Brehostibarnep mozü kidangi anir ao, ta ABS-CBN News ajanga ashir.

Arishi küm 61 tain Aquino ya linük indang tir 15 buba ama 2010 nungi 2016 tashi inyaka aru aser Rodrigo Duterte-i melenzük.

Brehostibar nikongdang Aquino'er kinungertemi sangdong ka nung, taoba tir ya renal disease agi shiranga arur Brehostibarnep 6:30 ako (par mapang) nung tesunep nung amozüka ao, ta ashi.

Par kibongi Aquino busemer aser pa tasütsü anasa par kilung nung inyaker dang pelaba lemsatep.

"Onok temolung raksaba o agi meshitet aser pa asenok nungi pilaogo ta agizüktsü asoshi mapang kobi agitsüar memetet," ta ashi.

"Taoba Tir Benigno S. Aquino III tanep asüba osang angazüka temolung khuremer," ta Supreme Court Justice Marvic Leonen-i ashi, sjiba Aquino-i 2012 küm iba mapa nung shimoka liasü.

"Pa ya dangar dak aria bilemba aser asen nüburttemi tenzüksü tejangraba nem anishidaktsü ta ni metet. Pai pa indang nungja akumtsübua aser ochishia abenba ni nguogo," ta Leonen-i ashi, shiba Moro Islamic Liberation Front den Aquino indang yimjung ken o jembitsür ama inyaka liasü.

Taoba Tiri linük asoshi shilem tajung agiba aser linük tenzüka atema pelar, ta Duterte indang odongtar Harry Roque-i ashi.

Aquino asüba mangyima linük indang nisan tum nung atsüketa ayutsü sorkari totuyuba agütsü.

Vice President Leni Robredo, shiba Aquino indang tembar ka lir, laia sangdong ka nung taoba tir asüba osang angashia temolung shiranger, ta ashi.

"Pa ya tembar tajung aser ochishir tir ka liasü. Nungtugu mesüaka kechi shidak, aji pai inyaksü merang," ta lai ashi.

Cardinal Jose Advincula, shiba Manila indang archbishop tasenba ama Brehostibarnü mapa nung aniok, paia Aquino nem akum tetushi agüja liasü.

Manila nung aliba European Union indang office-ia sangdong ka nung, "Asenok tesendaktep tali tajungba yanglutsü merangba tembar ka asüba atema mang ayimer," ta ashi.

Manila nung aliba German

Embassy ajanga sangdong ka nung Aquino-i pa mapang Philippines aser Germany tsüngta tesendaktep tajungba kumdaktsüba nung shilem agiba atema tenüngsang agüja liasü.

Maneni Manila nung aliba US Embassy indang Chargé d'Affaires John Law-ia Aquino'er kibong den asükhu lemsatep aser tesendaktep tajung asoshi par sorkari pa dang teti pelatsü, ta ashi.

Aquino yimsüsüba mapang Manila-i China anema The Hague nung aliba International Court of Arbitration nung South China Sea nung mangatetep aliba ken o benoka liasü.

2016 küm Aquino-i office yutsür ita ka lir iba ken o nung Philippines-i takok ngua liasü.

Pai küm trok yimsü asüba mapang linük nung rongsenketsüng tanemi renteta liasü. Ajisüaka pai mangatetep

ken o kar ajangshi, aser item rongnung 2013 Typhoon Haiyan sülen junga ketdang masüba dena liasü, kong nisung 6,000 dak tema asü.

Pa ya ochimashi mapa meinyakba nisung ka ta metetaka pa anemer aser pa den tokteper temi Congress nung pa den sendaktepa alir nem nüburttemi meyong senotsü lemsüktsüba onük benoka pa tenung menüksü.

Mangatetep aliba sorkar operation ka pai mela, kong linük south tsütsü Mindanao asetkong nung Malaysia nung telungpur lenir ka aputsü merangba mapang commando 44 tashi süa liasü.

Iba tatalokba ya ajanga Aquino-i anir Muslim nung telungpur den yimjung tezüngzüktepa atema inyakba maparen raksa.

(Maneni tapak 9 nung...)



Kabul, Afghanistan nung Afghan militiamen tem Afghan defense aser security forces den külemi adenshia aliba noksa nung angur. Tawa Taliban tashi ulushia akumba den raratsü atema Afghanistan indang defense ministry ajanga tesem balala nung aliba militia (nüburttemi tentetba sepai telok) tem nungi lenirtem den jembishinür. Afghanistan north tsütsü tongtipang district kar Taliban küboki aitogo.



Dimapur, Aami/June 24, 2021: International Widows Day anogomung (23.06.2021) nüngtem nung, "Invisible Women, Invisible Problems" omen kübok, Hope Channel Dimapur den Assam Rifles longjemer Dimapur temeküt aser telungtet nung alir amitsür 60 nem jang-o-tsü lema agütsü. Tang ama Covid-19 tensa tamajungdang yaritsü aser lotki nung parnok (amitsür) bendanga amshiba anema longjemer nokdaksü asoshi ajungmesotsü nükjidong nung iba sentong achaayanga liasü. Iba maparen metenzükdang, Team lennir, Tiakala Amri (Director, Hope Channel Dimapur)-i telok sarasadem ka ayongzük, ta sangdong ajanga metetdaksü.

Taoba Philippines...

(Tapak 8 nungi...)

2016 küm pa office yutsütsü anasa dengue mozü, Dengvaxia amshidaksüba nung shilem agiba indanga pa dang tasükdangba liasü.

Philippines nung Noynoy ta nüngja agütsüsang Aquino ya linük nung democratic icon ana indang jabaso kisüng liasü. Pa indang adianu tetsür pezü lir.

1986 küm dictator Ferdinand Marcos yimsüsüba menden nungi atsükdokba sülen pa tetsü, aser taoba tir Asür Corazon Aquino-i yimsü asü. 1989 küm mitkartemi sorkar atsükdoktsü merangba mapang pa tetsü kumzüktsü merangdang pa tera agi metepset.

Aquino tebu Benigno Aquino Jr ya tenüng agi senator ama inyaka aru, aser pa 1983 küm US nung jenoka aliba nungi meyipa shilangba mapang Manila international airport nung khaset. Pa tepsetba sülen nüburtemi yimsüsür anema longkak ait tenzük aser küm asem lir Marcos ya atsükdoka liasü.

2010 küm tir meshimtet dang Aquino ya 2007 nungi 2010 tashi senator ka ama inyaka liasü aser 1998 nungi 2007 tashi Tarlac province tenüng nung Congress züngsem ka ama inyak.

Tening nung sensitization sentong agitsü

Tening, Aami/June 24, 2021 (TYO): Vaccine agitsü temsüa alir ajak nem mozü agütsütsü asoshi Vaccination Drive sentong takaraba achaayanga agitsü aser iba den külemi SDTF senden nung lemtetba ama, District Administration aser Medical department, Tening nati Tening aser Nsong circle kübok yimtsüng ajak nung COVID-19 - sensitization

program aser COVID-19 dak sendakba tanga maparen achaayangtsü, ta sangdong ka ajanga Additional Deputy Commissioner & Chairman SDTF Tening, Rosietho Nguori-i metetdaksür.

Anüngji, iba sentong dak sendakba nung, pei pei tata yimtsüng nung sentong takok ngua agitsü asoshi, circle ana telungtet yimtsüng ajak nung

yimsüsür temi tesemdang ketdangsurtem anepalutsü mepishir. Iba den bendenloksema, iba sensitization sentong agiba mapang, Village Task Force züngsem aser yimtsüng nung Sannükertem den village council züngsem ajak aruagi adentsü osang agütsütsüla ta yimtsüng ajak nung yimsüsür dang mepishir, ta kasa sangdong nung shia lir.



Marepkong Youth Association ketdangpurtemi Mokokchung District Task Force nem tenla meyi ter (Rs. 10,000/-) DTF mendenbuba Mokokchung DC, Limawabang Jamir nem amoktsüba mapang tangokba noksa nung angur. Mokokchung, June 24, 2021.

MULUNGNEN O

LT. MOATEMSU YADEN
(08/08/1972 - 14/06/2021)



Kija, kibong aser lokti kwinakati Ozü dang temeim aser aria bilema, wara tesashi liaka nübu, sarasadem, rongsen aser tajungshi O agi aochi temeim aser mapa tajung sayuogo, nenok ajak dang kinungertemi, ozü mulungjang taroktiba nungi pelaba lemsateper.

Tsüngremi nenok kija aser lokti ajak maneni moajangma ta, onok sarasadem lir.

Talisa item telok dang alakteta pelar:

1. Doctors and Nurses of Faith Hospital Dimapur.
2. Merangkong Senso Telongjem Dimapur.
3. Merangkong Godhula Mission Evangelist.
4. Tuli Lenden Ao Baptist Arogo.
5. Borbora Ward Committee, Tuli.
6. Merachiba Memorial Govt. High School, Merangkong.
7. Merangkong Employees Union

Temeim Kinungertem.

OFFICE OF THE UNGER KOSASANGER PUTU MENDEN

(Village Council)

P.O. Chuchuyimlang B.P.O. Unger Pin-798614

Dist- Mokokchung : Nagaland

KONANG TETUSHI AGÜTSÜR

Wb. C. Lima Imsong sorkar mapa nung Joint Commissioner of State Taxes promotion ngua yimden aser sensosanger ajak nem konang nungsang tulu bener arutsü nung Unger Kosasanger Putu Menden ajanga pelar aser konang tetushi agütsür.

Tarutsü nung Tsüngremi nü wadang aser nür kibong maneni moajang.

R. Toshi Imsong

Chairman

Unger Village Council



OFFICE OF THE UNGER KOSASANGER PUTU MENDEN

(Village Council)

P.O. Chuchuyimlang B.P.O. Unger Pin-798614

Dist- Mokokchung : Nagaland

PELABA LEMSATEPER

Ozü lenir tajung **Shri. Imnatiba**, Honbl'Advisor Industry & Com. ajanga yimdaklirtem kanga dang nüngdaka aliba iba Covid-19 wara tulu nung amshitsü atema Oximeter tajung ana agütsü nung Unger Kosasanger Putu Menden ajanga kanga pelaba lemsateper.

Par kibong aser Pa wadang teyanglur Tsüngrem-i tali moajang.

R. Toshi Imsong

Chairman

Unger Village Council

Mulungnen O

ASO : 14/10/1945 ~ ASÜ : 18/26/2021

Onoki kodanga amatsü makokba temeim ojala asür **L.Atula Jamir** (Moulungyimsen) mapang tatsüka shiranga alidang aser ozü asüku mapang kija, kibong, kiyonger, Naga United Village (NUV) Ao Baptist Arogo, NUV Ao Union, Molungyimsen Union Dimapur, Khar Union Diphupar, Doctors & Nurses of Zion Hospital Dimapur aser tembartem kwikati nebur, rongsen aser tamang sarasadem agi yariogo, nisung shia tenüng teta onoki pelaba melemsateter, saka nenok teyari onoki kodanga mamatsü ta iba adok ajanga lemsateper

Tsüngremi nenok mapa tajung asoshi talubosa moajangma ta onok sarasadem.

Temeim Kinungbo, Jala, Jabaso, Semchir aser Kinungertem.



Mokokchung, Aami/June 24, 2021: Health & Family Welfare Department aser NSRLM Mokokchung longjemer Brehostibarnü (24.06.2021), Chuchuyimlang Block, Mokokchung kübok Salulamang yimtsüng nung Covid-19 vaccination drive sentong ayongzuka liasü, kong yimdak alir arishi küm 18 tain aser temapur ajak nem vaccine agütsüogo. Iba vaccination drive sentong takok ngua achaayangba atema Salulamang yim tenüng nung Putu Menden ajanga Health & Family Welfare Department aser NSRLM Mokokchung dang pelaba lemsateper.

Copa America: Brazil-i goal 2-1 agi Colombia kokogo

ECUADOR ASER PERU NA DRAW NUNG TEMBANG

Rio de Janeiro, Aami/June 24, 2021 (Agencies): Tang asaya aliba Copa America nung Brazil-i maneni takok ngua asaya arudar aser Bodhbarnü parnoki Colombia madak goal 2-1 agi takok angur.

Telok ana tsüingda asaya temer mapang talila apuloktsür asayaba mapang, asaya atemtsü lia Casemiro-i goal ka idaktsüba ajanga "Selecao" puri iba asaya koktet. Iba South American championships nung Brazil team-i point tuku tashi nguogo aser parnoki asaya 11 nung atonga takok angur alitsü.

Ajisüaka, iba takok ya mangatetep adoka tembanga liasü. Iba asaya tanabuba half nung Neymar ajanga metsülöktsüba ball Argentine referee Nestor Pitana dak ondaker aoba mapang, Roberto Firmino kolak agi goal ka tongoktsü. Ibaji ngua, Colombia asayatem referee dang kanga mepela, koba VAR repringshima aser mapang talangka telok ana tsüingda tebang agi raratep, saka telemteba kecha magütsü iba goal agizüka maneni asaya liasü.

Tejashi tulu nung, Colombia



Rio de Janeiro, Aami/June 24, 2021: Copa America asayamung nung Brazil-i Colombia madak takok anguba sülen, asayatem pelatepba yangi noksa nung angur.

Euro 2020: Portugal aser France na draw nung tembang

Budapest, Aami/June 24, 2021 (Agencies): Euro 2020 asayamung nung, Bodhbarnü Group F nungi Portugal aser France na asaya draw (2-2) nung tembanga, team anaprongla last 16 tongogo. Cristiano Ronaldo teyari ajanga Portugal team pur Euro 2020 nung maneni asaya arudaki.

Ronaldo aser France nungi Karim Benzema nati goal anana idaktsü. International asayamung nung küm pungo dak tema shilem magii arur sülen, Euro asayamung nung Benzema anioka liasü aser iba asayamung nung pai mezüing goal (international goal) idaktsür alitsü.

Ajisüaka, Ronaldo-i goal ana idaktsüba den külemi pai Iran nung Ali Daei indang international goal 109 - record menepogo.

Iba asaya nung penalty asem

fans temi social media sabang ajanga, referee tenüing amshia tilutsü aser pa "Brazil indang asayar 12buba liasü," ta adoktsü.

Goal ka ka idaktsür sülen latetja aliba mapang tembanga arudang, minute 10 talila apuloktsür asaya, kong Casemiro-i Brazil atema goal tanabuba idaktsü mapang Colombia pur tali mepelai aküm.

Ajisüaka, Colombia, shirnoki asaya pezü nungi point 4 tashi

ngua Group B nung tanabuba jenjang tongteta lir, parnok quarter-final-i iogo.

Rio de Janeiro stadium nung telok ana tsüingda asaya tenzüker, Porto nungi wing asayar, Diaz-i minute 10buba nung mezüing goal idaktsü. Penalty tesem nungi Juan Cuadrado-i metsüketa yokba cross ball ka agizüka Diaz-i 'bicycle kick' tasa amshia Brazil keeper Weverton adena

Colombia atema iba goal idakja liasü.

Iba goal idaktsüba sülen, Colombia-i defence tsütsü akanga nokdak aser Brazil puri ball timba amshia asaya, saka telok kati danga goal idaktsütsü maongka mangu.

Break sülen, minute 78buba nung Brazil atema Firmino kolak agi goal ka idaktsü. Idangjisa, referee Pitana dak ondaker aoba ball nung maongka agia Brazil-i iba goal idaktsür sülen, asaya manendaktsüba atema Colombia puri ashishitsü tenzüker aser referee den ashishitepa liasü.

Ajisüaka, Pitana, shiba 2018 World Cup final nung referee liasü, video (VAR) repringba sülen, pai iba goal agizük.

"Kanga meranga aser toktepa asaya arur, alima nung team tajungtiba den asayatsü maongka angur. Ajisüaka, iba ama telemteba ka nung onoki asaya makok," ta Juventus striker Cuadrado-i ashi.

"International asaya tsütsü

ronnung Ronaldo-i mezüing minute 31buba nung idakja par telok goal 1-0 agi France tejkadang ser asaya, saka half time tonger mapang talila apuloktsür asayaba mapang, Benzema-ia penalty ka idakja telok anaprongla goal 1-1 ser mezüing half tembang.

Break sülen, asaya tenzüklidang Paul Pogba ajanga metsüba ball ka Benzema-i agizüka minute 47buba nung France atema pai goal tanabuba idaktsü. Iba mapang, 2016 küm kasa asayamung final nung France madak takok angur Portugal telok iba tetoktepba nungi tukadoktsü ama asadangteta liasü.

Teimla melii asaya aoba mapang, Portugal-i penalty ka metsütsü maongka ngua minute 60buba nung Ronaldo-i goal tanabuba idaktsü. Ronaldo-i iba penalty memetsüdang, Pogba-i

goal ka idaktsütsü maongka angur, saka pai metsüba ball ji crossbar nung ondak.

Tang, Group F nung Portugal pur point 4 tashi ngua Germany (four points) tesülen tasembuba jenjang nung lor. Kasa group nungi Germany aser Hungary na draw (2-2) nung tembangogo.

Taruba round nung Portugal-i Belgium den asayatsü. Kasa mapang, group nung point 5 ngua temaba jenjang tongteta alir telok - France-i Wembley nung England melena Switzerland team den asayatsü terenemba lir.

Portugal puri mezüing half amokbanga asaya aser Lloris-i asaya yimya dak mapet bentshia Danilo alangdaktsüba sülen Portugal-i penalty ka metsütsü maongka angur. Ronaldo-i iba penalty memetsüdang, Lloris nem yellow card agüja liasü.

tjangshiba tajung alir referee ka, shibai World Cup asayamung tashi nung referee inyakdangogo, iba ama referee kati aibelen dang asaya nung timtem adokdaksür," ta pai ashi.

**** Ecuador aser Peru na draw nung tembang ****

Goiania kübok, kasa asayamung asaya tanga ka nung, Ecuador aser Peru na draw 2-2 nung tembang.

Iba asaya mezüing half nung, Peru nungi Renato Tapia-i par telok indang nung goal idaktsüba ajanga, minute 23 sülen Ecuador pur goal 1-0 agi tejkadang ser asaya.

Mezüing half atemtsü lia, Ayrton Preciado-i goal ka idakja Ecuador pur goal 2-0 agi Peru tejkadang kümadak.

Break sülen, Christian Cueva-i metsüba ball ka Gianluca Lapadula-i agizüka minute 49 nung Peru atema mezüing goal idaktsü. Tatsüka dang lir, minute 54buba nung Andre Carrillo-i Peru atema goal tanabuba bendenlokja liasü.

Ecuador pur point ka dang ngur lia iba asaya nung shilem agiogo, koba Venezuela den draw asüba mapang parnoki iba point ajangzüktet. Kasa group nung Peru-i point asem ngua lir. Iba asaya temer sülen team anapronglai point ka ka nguogo.

Tang, Brazil pur point 9 tashi ngua temaba jenjang tongteta lir. Ano külen, Ecuador aser Venezuela na point anana nguogo.

Bodhbarnü masayadang, Brazil pur quarter-final tonger liasü; aser tang Colombia-a quarter final tongogo.

Deobarnü, Brazil-i Ecuador aser Peru-i Venezuela den asayatsü. Group shia nung, team pungo nungi temaba team pezü tashi quarter-final nung asayatsü.

Shri Metsubo Jamir dang pelar

Tang ama wara mapang nung Aongza Ward, Mokokchung nung COVID-19 agi kongshiba kibongtem nungdak perija yariba atema onoki RD Minister, Shri Metsubo Jamir aser par kibong dang kanga pelaba metetdaksür.

COVID-19 tanabuba wave yagi onok taküm nung kanga mejungi kongshia liasü aser iba ama tensa mapang taküm alitsü atema onok kanga shisabulua liasü. Ajisüaka pei nübür meimba tanela sayua aser chichiba lennir ka ama, Shri Metsubo Jamir aser par kibongi onok nungdakba angateta kin, lokti mesüra tamangba yimsü kecha mebendangi COVID agi kongshir kibong aika nem nungdakba teyari agütsüogo. Tang ama tensa tamajungdang onok metaloktsü asoshi shinga maliba mapang ka nung par kibongi onok timtem khuret pungbadaktsüogo.

Onok temulungjang taroktiba nungi pelaba lemsateper aser Tulusang Tsüngremi Minister aser par kibong molamoshia moajangma ta onoki sarasademtsür.

Sd/-

1. Moayanger.
2. Basenta.
3. Pangersunep.
4. Shilulemba.

Sd/-

5. Chidenla Khamniungan.
6. Pusa Hrangkhawl.
7. Chubasenla Sangtem.
8. Riyus Muhammad.



Aizawl, Aami/June 24, 2021: Brehostibarnü, Mizoram Chief Minister, Zoramthanga-i Lalremsemi nem sempet ama sen lakh 10 indang cheque ka agütsüba noksa nung angur. Aruya aliba Tokyo Olympics atema Indian Women's Hockey Team nungi Lalremsemi asayatsü.

BILEMDANGANG

"Ne taküm lenmangji nai lepoka aotsüla."